

АВГУСТА В 30-й ДЕНЬ.

СЛУЖБА ПРЕПОДОБНОМУ АЛЕКСАНДРУ СВИРСКОМУ

НА МАЛОЙ ВЕЧЕРНИ

На Господи, возвах: стихиры на 4, глас 4.

Подобен: Яко добля:

Воздержанием страсть плотскую / умертвил еси / и душу оживил еси / постом и добродетелей священием. / Отсюда же явился еси, яко жив, / и по кончине воистинну: / якоже бо сон, вменися тебе смерть, / к Богу преставльшуся и в руке душу преложду Ему, / Александре всеславне.

Страстей успил еси желания, / Александре, / бдение всенощное стяжав, / великое послушание, / смирение, поучение же Божественных писаний, / и сердце чисто, и ум несмущен. / Темже был еси приятелище Духа Святаго, / зарями чудес облистаюаго тя всегда.

Мирское пристрастие / до конца возненавидел еси / и безстрастия сосуд был еси, / любомудрия же, славне, / детельным восхождением возвысился еси / к самому желанию конечному, / узрел еси тайны видением невидимых, / недомысленныя Божественныя доброты, Александре всемудре.

Слава, глас тойже:

Духовною благодатию / отъемлещи недуги страстей / и отгониши духи лукавья, / исцеляещи страсти неисцельныя, / Александре всеславне, / и просвещаещи верныя блистания чудес твоих. / Темже днесь гласы немолчными / воспеваем пресветлую и светоносную память твою.

И ныне, Богородичен:

Избави нас от нужд наших:

На стиховне стихиры, глас 4.

Подобен: Дал еси знамение:

Светло возсия, / яко солнце преподобне, / всепразднственная память твоя, / зарями облистающа твоих добродетельных деяний, / О всеблаженне, / и озаряющих верных мысли сиянием чудес твоих. / Сию убо празднующе, радостно ты почитаем, / монашествующих похвало и верных утверждение.

Стих: Честна пред Господем смерть преподобных Его.

Долу леганием и востанием, / и слез течении оскорбляемь, / и всенощными стоянии изнуряемь, / монахов был еси образ велий, / и общее правило, и похвалы венец: / всяк бо вид добродетелей исправив, / Вышняго Царствия наследник явился еси, / премудре, воздержанием.

Стих: Блажен муж, бояйся Господа, в заповедех Его восхощет зело.

Чудо паче ума во успении твоём бысть, / богоукрашенно чудесне, / внегда ти собор монашествующих, / отче, предста и внезапно, яко солнце, мудре, / лице твое облиста, паче солнечных луч возсиявши, / являя блистающую твоея души чистоту и уверяя всех, / какову кончину, блаженне, получил еси.

Слава, глас 6:

Яко Божественнаго пастыря и учителя / тя вси восхвалим днесь: / ново бо нам, яко многосветлая звезда, / в Российской стране просияв, / чудеса твоими весь мир удивил еси, / в пустынях же непроходимых / мужески подвизався, и, крепко терпя, / врага победил еси до конца. / Темже христоименитое твое стадо упасл еси / и храм Господеви воздвигл еси любовию, / Александре премудре, / и яко воистинну / Божественныя благодати сподобився / и в Небеса вселився, / зриши Святыю Троицу, / Юже моли спастися душам нашим.

И ныне, Богородичен:

Богородице, Ты еси лоза истинная, / возрадившая нам Плод живота, / Тебе молимся, молися, Владычице, / со святыми апостолами помилovati души наша.

Тропарь, глас 4:

От юности, Богомудре, / желанием духовным в пустыню вселився, / единого Христа возжелал еси усердно / стопам в след ходити. / Темже и ангельстии чини, зряще тя, удивишася: / како, с плотию к невидимым кознем подвизався, премудре, / победил еси полки страстей воздержанием / и явился еси равноангелен на земли. / Александре преподобне, / моли Христа Бога, да спасет души наша.

НА ВЕЛИЦЕЙ ВЕЧЕРНИ

Блажен, муж: **1-й антифон.**

На Господи, воззвах: **стихиры на 8, глас 6.**

Подобен: Всю отложивше:

Вседержительною десницею укрепляемь, / вся отверг страстей безсловесия, / плоть духу покорил еси / и был добродетелей правило, / монахов утверждение, / постников образ, / преподобных удобрение. / И ныне неизреченныя доброты зриши / Неразделимая Троицы, / Александре премудре, / питаюся присно Божественными добротами / на Небесех духом. / Тем, сошедшеся, пении духовными, / в песнях твою честную / и всепразднственную память празднуем.

Стратная взыграния воздержанием / вся отвергл еси / и, многомятежное плоти волнение укротив, / дыхания страстного пребыл еси непреклонен, / яко столп, укрепляемь духовными бронями, / умом доблественным, / Александре премудре. / И ныне, Божественного получил еси воистинну / видения светлости Святыя Троицы, / к Нейже желая, блаженне, / преставился еси, / наслаждаяся нескончаемья доброты, дарованием обожаемь.

Подобяся Илии и Иоанну, / светильнику Света, / возлюбив молчати в местех темных / и в пустынях непроходных, / восхождению всегда поучаяся / Божественному и преспевая добродетелей путем. / Темже достигл еси желание крайнее, / Александре премудре, / и, радуяся, предстоиши Трисианному Святыя Троицы Свету, / от негоже неходатайственне Божественныя приемля зари. / Темже со дерзновением / молися о душах наших.

Преподобне и Богоносе отче наш Александре, / любве ради Христовы вся оставил еси / и, в пустыню вселився, / никакоже утрашил еси невидимых враг борения, / аще бо и многажды пришедше на тя, / мечтании привидения ти показующе, / ты же и молитвами твоими, / яко прах, тех без вести творил еси. / О, непорочныя твоя души и крепкаго терпения твоего! / Христа непрестанно моли спастися душам нашим.

Слава, глас тойже:

Яко божественна жизнь твоя, / такожде и всеосвященный твой исход, / преблаженне отче наш Александре. / Днесь бо ликующе в память преставления твоего, / всея страны множества народа стекшеся, / яко видеша тя, без дыхания на одре лежаща, / гласы велегласными вопияху: / даждь нам конечное слово утешения, / рабом твоим, святе, и научи ны, чада твоя, / отче, яже ущедрил еси, яко отец, / како ты по достоянию похвалити возможем? / Поистинне яко милостив и щедр быв, преподобне. / Обаче аще и zde ты гроб покрывает, / но страна тя Российская вся богатна имать / предстателя и молитвенника к Святей Троице, / Юже непрестанно моли о душах наших.

И ныне, Богородичен:

Кто Тебе не ублажит, Пресвятая Дево; / кто ли не воспоет Твоего Пречистаго Рождества; / безлетно бо от Отца Возсиявый Сын Единородный, / Тойже от Тебе, Чистыя, пройде, / неизреченно воплощя: / естеством Бог сый, / и естеством быв Человек нас ради, / не во двою лицу Разделяемый, / но во Двою Естеству / неслитно Познаваемый. / Того моли, Чистая, Всеблаженная, / помиловатися душам нашим.

Вход. Прокимен дне. И чтения три преподобническая.

Премудрости Соломони чтение (главы 5 и 6):

Праведницы во веки живут, и в Господе мзда их, и попечение их у Вышняго. Сего ради примут царствие благолепия и венец доброты от руки Господни, зане десницею покрывает я и мышцею защитит их. Приимет всеоружие рвение свое и вооружит тварь в месть врагом. Облечется в броня правды и возложит шлем суд нелицемерен. Приимет щит непобедимый преподобие, поострит же напрасный гнев во оружие, споборет же с ним мир на безумныя. Пойдут праволучныя стрелы молниины и, яко от благокругла лука облаков, на намерение полетят, и от каменометныя ярости исполнь падут грады. Вознегодует на них вода морская, реки же потопят я нагло. Сопротив станет им дух силы и, яко вихор, развеет их, и опустошит всю землю беззаконие, и злодейство превратит престолы сильных. Слышите убо, царие, и разумеите, навькните, судии концов земли. Внушите держащии множества и гордящиися о народех язык, яко дана есть от Господа держава вам и сила от Вышняго.

Премудрости Соломони чтение (глава 3):

Праведных души в руце Божией, и не прикоснется их мука. Непщевани быша во очесех безумных умрети, и вмения озлобление исход их, и еже от нас шествие сокрушение, они же суть в мире. Ибо пред лицом человеческим аще и муку примут, упование их безсмертия исполнено. и в мале наказани бывше, великими благодетельствовани будут, яко Бог искуси я и обрете их достойны Себе. Яко злато в горниле, искуси их и, яко всеплодие жертвенное, прият я. И во время посещения их возсияют и, яко искры по стеблию, потекут. Судят языком и обладают людьми, и воцарится Господь в них во веки. Надеющиися Нань разумеют истину и вернии в любви пребудут Ему, яко благодать и милость в преподобных Его и посещение во избранных Его.

Премудрости Соломони чтение (глава 4):

Праведник аще постигнет скончатися, в покой будет. Старость бо честна не многолетна, ниже в числе лет исчитается. Седина же есть мудрость человеком, и возраст старости житие нескверное. Благоугоден Богови быв, возлюблен бысть. Восхищен бысть, да не злоба изменит разума его или лесь прельстит душу его. Рачение бо злобы помрачает добрая и парение похоти пременяет ум незлобив. Скончався в мале, исполни лета долга, угодна бо бе Господеви душа его, сего ради потщася от среды лукавствия. Людие же видевшие и не разумевшие, ниже

положше в помышлении таковое, яко благодать и милость в преподобных Его и посещение во избранных Его.

На литии стихиры, глас 1. Самогласны:

Приидите, вси концы земли, / псалмы и песньми незаходимаго света, / великаго светильника вселенней, / воспоем вси Александра, / паче бо солнца возсия / в твердыни веры и верных собрание к добродетели настави: / ово убо Боговдохновенными учении / и спасительными глаголы в вожделении, / яже независтно и обильно устны источаше, / ово же детелию чудною, / равноангельным житием к ревности привлекача, / и обоя житие и слово преславно, / якоже вождь изряден, / богоподобно показуя. / Того молитвами, Христе Боже наш, / Твое стадо соблюди и православных веру утверди, / яко Человеколюбец.

Приидите, монахов множества, днесь, / Христова рачителя благочестно восхвалим, / истиннаго ученика Спасова и красоту / и хвалу единообразных всех и наставников, / освященнаго от младенства Господеви, / лица отец, сошедшесе, ублажим. / Сей бо желание Божественное / в себе приим, / мирскую убо остави прелесть, / взят же ярем Христов на рамо и полки бесов победи мужески, / показав нам детельно Божественныя любве изрядный путь, / ибо и сия претек во тщании, / постиже свет истинный Троицы Вседетельныя. / О, чудесе ужаснаго и вещи богоподобныя! / Яко земный естеством равен бысть мысленным сущетвом, / славу и честь Божию восприемля, / и молитвенник нам бывает, / яко да улучим вечных благ в День Судный.

Яко Божественная и светоносная наста / память преставления твоего, отче, / яко удиви мысленных / и ужаси человеки, пречудне, / труды воздержания твоего жития, / яко безплотен отнюд, / во плоти страстне враги невидимыя посрамил еси. / Вся убо страна отечества твоего поет тебе благочестно, / изряднее же твое честное стадо, / светлость твоих болезней и трудов, / еже показал еси, / яко град в пустыни прекрасен, / иже пристанище собором монашеским богоподобно, / иже, яко одеждами многочисленными твоими, / красуется чудесы, / и доблестными страданияи подвиг твоих, Александре, / и молитвами твоими, притекающе ко Христу, / имущему велию и богатую милость.

Слава, глас 5:

Радуется днесь вся Российская страна, / Великий же Новград да веселится, / торжествуя, яко имея в пределах области своя / неистощимое сокровище. / Верных же множества Российския земли, / стекшеся днесь, вострубим трубою песней: / благодать бо Духа, всякия трубы боголепнейши, / всех созывает к пению Богоносного отца. / Монаси и простии да чудятся всех Царя искреннему рабу, / иже миродержца начала и власти тьмы / Духа Божественного всеми оружии победы. / Пастыри и учителя изрядного воистинну правила же и образа пастве да восхвалят, / иже в добродетелей повелении светлаго, / и в вере благоразумного, / и в видении високаго, в деяниих Богомудраго, / во учениих же пищи потока, / наставника заблудшим, / избавителя плененным и всех болящих исцеление, / отечеству своему великое украшение, / похваляюще, вси рцем: / отче преподобне Александре, / предстани твоим рабом всегда и спаси стадо твое молитвами твоими.

И ныне, Богородичен, глас тойже:

Духа Божественного благодатию, вернии, / днесь вострубим трубою песней: / приникнувши бо свыше, / Всецарица Мати Дева благословением венчает воспевающих Ю. / Монаси и простии да стекутся и Царице / восплещут в песнях, / Царя рождшей, / Иже смертью одержимы / прежде отпустить благоизволивша. / Пастырие и учителя, / добраго Пастыря Пречистую Матерь, / сошедшеся, восхвалим, светильника светозарнаго, / светоноснаго облака, небес ширшую, / одушевленный ковчег и огнеобразный Владычень престол, / манноприемную златую стамну, / затворенную Слова дверь, / всем христианом прибежище, / песнями богогласными похваляюще, сице рцем: / Палато Слова, сподоби смиренных / нас Небеснаго Царствия, / вся бо возможна суть ходатайству Твоему.

На стиховне стихиры, глас 5.

Подобен: Радуйся:

Радуйся, ангельским беседа ликостоянием, / Александре преподобне: житие бо твое, отче, / на земли добродетельно стяжав, / пожил еси. / Показался чистоты нескверное зецало воистинну, / лучезарная восприемля молнии Духа Святаго всеславно. / Отонудуже озаряемь, / зрел еси будущая, вся предглаголя, / от Божественнаго светоявления научаемь / Христа, Егоже моли / душам нашим подати велию милость.

Стих: Честна пред Господем смерть преподобных Его.

Радуйся, постником споспешник быв / и непобедим поборник: / страстей бо отсекая корень и бесов стремления, / представ мужески, Александре, / тех посрамил еси душепагубную прелесть, / Креста же Спасова действо и непобедимую явил еси силу, / еюже и препоясався, / победил еси вся, / отметающия плотское явление Христово. / Егоже моли душам нашим подати велию милость.

Стих: Блажен муж, бояйся Господа, в заповедех Его восхощет зело.

Столп световиден, добродетелию утвержден, / облак светел, / иже во отечестве твоём явился еси, отче, / к Небеси от земли Бога зрящих предводя; / крестною палицею страстей пресек море / и, мысленнаго Амалика отринув, / непреткновенный Небесный восход обрел еси, / Богоблаженне Александре, / и жребий неприминующ, / со Безплотными предстоя Престолу Христову, / радуясь, Егоже моли душам нашим подати велию милость.

Слава, глас 6:

Приидите, вси концы земли, / псалмы и песньми священное и честное преподобнаго торжество / Александра днесь благочестно восхвалим, / преподобных отец единокормителя и пустынолюбную доброту воспоем, / постников украшение, / источника чудес, / к Богу молитвенника непостыдна, / стекшеся, о празднлюбцы, / песньми похвальными воспоем, глаголюще: / радуйся, монашескаго жития правило, / образ и печать известная. / Радуйся, светильниче пресветлый, / озаряя всяку добродетель светлостми твоего жития. / Радуйся, в бедах великое утешение / и теплый предстателю предстоящим. / Не престай моля Христа Бога / о стаде твоём и всех верных, / почитающих всечестное твое усение.

И ныне, Богородичен:

Творец и Избавитель мой, Пречистая, / Христос Господь, / из Твоих ложесн прошед, / в мя оболкийся, / первая клятвы Адама свободи. / Темже Ти, Всечистая, / яко Божии Матери же и Деве воистинну, / вопием немолчно: / радуйся Ангельски, / радуйся, Владычице, / Предстательство и Покрове / и Спасение душ наших.

Тропарь, глас 4:

От юности, Богомудре, / желанием духовным в пустыню вселився, / единого Христа возжелал еси усердно / стопам в след ходити. / Темже и ангельстии чини, зряще тя, удивишася: / како, с плотию к невидимым кознем подвизався, премудре, / победил еси полки страстей воздержанием / и явился еси равноангелен на земли. / Александре преподобне, / моли Христа Бога, да спасет души наша.

Слава, и ныне, Богородичен:

Глас 4:

Еже от века утаенное / и Ангелом несведомое таинство, / Тобою, Богородице, сущим на земли явися Бог, / в неслитном соединении воплощаемь / и, Крест волею нас ради восприим, / имже воскресив первозданного, / спасе от смерти души наша.

НА УТРЕНИ

По 1-й стихологии седален, глас 1.

Подобен: Гроб Твой:

Многосветлая звезда монашествующим / показался еси и степень известен, / воздержания же предел, / пресветлое зеркало разсуждения, преподобне, / память твою радостно совершающим. / Разрешения проси согрешений, преблаженне, / Богу предстоя.

Слава, и ныне, Богородичен:

Настави ны на путь покаяния, / уклонившая присно к безпутием зол / и Преплагаго прогневавшая Господа, / Неискусобрачная Благословенная Марие, / прибежище отчаянных человеков, Божие жилище.

По 2-й стихологии седален, глас 3.

Подобен: Божественныя веры:

Божественным желанием безсмертия, / Александре, / одержим и крест на рамо взем, / в пустыню желанием вселился еси, / идеже, преподобне, Господеву собрал еси стадо. / Темже и молитвенника тя тепла стяжахом ко Господу.

Слава, и ныне, Богородичен:

Божественная скиния была еси Слова, / едина Пречистая Мати Дево, / чистотою Ангелы превозшедшая, / паче всех мене, персть бывша, / осквернена плотскими прегрешеньми, / очисти молитв Твоих Божественными водами, / подаючи, Чистая, велию милость.

По полиелеи седален, глас 8.

Подобен: Премудрости:

Видение и деяние восприим, / чувства, преподобне, / украшая, житие управил еси к Божественным повелением, / монахом бо явился еси светильник пресветел, / наставляя нас к познанию. / Темже, восхваляюще тя, величаем любовию исходную память твою, / Богоносе Александре. / Сего ради вопием ти: / моли Христа Бога прегрешений оставление / даровати чтущим любовию святую памть твою.

Слава, и ныне, Богородичен:

Небесную дверь и кивот, пресвятую гору, / светлый облак воспоим, / неопалимую купину, словесный рай, / Евы воззвание, вселенная вся великое сокровище, / яко спасение в Ней соделася мірови / и оставление древних согрешений. / Сего ради вопием Ей: / молися Сыну Твоему прегрешений оставление / даровати благочестно покланяющимся Всесвятому Рождеству Твоему.

Степенна, глас 4. Антифон 1-й, ихже стихи повторяюще поем:

От юности моя / мнози борют мя страсти, / но Сам мя заступи, / и спаси
Спасе мой.

Ненавидящий Сиона, / посрамится от Господа, / яко трава бо огнем / будете
изсохше.

Слава: / Святым Духом / всяка душа живится, / и чистотою возвышается, /
светлеется Троическим Единством священнотайне.

И ныне, тойже.

Прокимен, глас 7:

Честна пред Господем смерть преподобных Его.

Стих: Что воздам Господеви о всех, яже воздаде ми?

Евангелие от Матфея, зачало 43.

По 50-м псалме

Слава: / Молитвами апостолов, / Милостиве, очисти / множества согрешений
наших.

И ныне: / Молитвами Богородицы, / Милостиве, очисти / множества
согрешений наших.

Таже, глас 6: Помилуй мя Боже / по велицей милости Твоей, / и по
множеству щедрот Твоих / очисти беззаконие мое.

Стихира, глас 6:

Возсия днесь пресветлая и всепразднственная память твоя, / Богоблаженне, /
созывающи многочисленное постник / сословие и преподобных всех
ликостояния, глаголющи: / аще бо и телесне язык умолче, / но сами чудеса
свидетельствуют от гроба твоего, / и вся же страна отечества твоего, проповедуя,
хвалится: / имею бо в себе, рече, неистощимое сокровище, / пречестную и
всебогатую раку мощей твоих, / облагоухающую душевная наша чувства, /
Александре, отче наш, / моли Христа Бога спастися душам нашим.

Канон Богородицы со ирмосом на 6 и преподобного Александра на 4, глас 4.

Песнь 1

Ирмос: Моря чермную пучину / невлажными стопами / древний
пешествовав Израиль, / крестообразными Моисеовыми руками /
Амаликову силу в пустыни победил есть.

Божественного и Пресвятого Духа блистаяся благодатию, светоносное,
Александре, и честное совершающих твое успение, светлую молитвою твоею
страстей мглу очисти.

От юности, преподобне, ярем Господень восприем, в браздах твоего сердца пшеницу сеял еси духовну и клас пожал еси, утверждающ души, Богоблаженне.

Светоносная память твоя нам днесь возсия, яко солнечная луча, Александре, исправлений твоих, страстей наших отъемлющи облак, юже сотворяюще, верую тя и любовь уболажаем.

Богородичен: Зачала еси, Пречистая, неизреченным словом содержащаго земные концы и Сего родила еси, Егоже моли прилежно помилovati нас.

Ин канон на 4, глас 2.

Песнь 1

Ирмос: Во глубине постла иногда / фараонитское всеоинство преоруженная сила. / Воплощенное же Слово / всезлбный грех потребило есть, / препрославленный Господь, / славно бо прославися.

Божественную память твою, Богомудре отче, верно празднующе, всяческих Господа присно славим, тя прославльшаго многими чудесы.

Безстастия желанием теплым, отче, одержим, вещныя увядил еси страстей волны, Александре, и достигл еси, любовь вперяемь, присносущнаго сияния, преблаженне, Божества.

Добродетельно изначала прием житие, пребогате, банею, отче, пакибытия, дар духовный от младенства божественне, твоя души благолепие, Александре, показал еси, солнца светлейше.

Богородичен: Младо Отроча паче слова родила еси, Ветхаго Деньми, нову на земли стезю добродетелей показавша. Тем угодник Твой присный Александр, Отроковице, любовь снедаемь, сий храм Тебе созда.

Катавасия: Крест начертав Моисей, впрямо жезлом Черное пресече, / Израилю пешеходящу, / тоже обратно фараоновым колесницам ударив совокупи, / вопреки написа непобедимое оружие. / Тем Христу поим Богу нашему, / яко прославися.

Песнь 3

Ирмос: Веселится о Тебе Церковь Твоя, Христе, зовущи: / Ты моя крепость, Господи, / и прибежище, и утверждение.

Жезлом воздержания страстное море, отче, разделив, прешел еси неистоплен, и предел достигл еси истиннаго безстрастия, и, Богу предстоя, беседовал еси ума чистотою.

Кто твоя подвиги, Александре, по достоянию изрещи возможет? Ты бо, пути жестокия в пустыни шествуя, сурово былие ял еси, вкушение же отлагал еси пици болезнями воздержания.

Яко маслина плодовиата в дому Господни, прозябл еси, маслом трудов твоих, Александре, умащая наша лица; поющая тя, преподобне и Богоблаженне, вся ны посети, моляся Человеколюбцу.

Богородичен: Из Тебе, Чистая, Цвет неувядаемый, благоухая все человечество Божественным муром естества Своего, Иже Отцу Собезначальный, из Тебе быв под летом, Дево Всенепорочная.

Ин

Ирмос: На камени мя веры утвердив, / расширил еси уста моя на враги моя, / возвесели бо ся дух мой, внегда пети: / несть свят, якоже Бог наш, / и несть праведен, паче Тебе, Господи.

Потом воздержания твоего пламень страстей погасил еси и одождием молитв струи чудес источил еси, болезнями разжжения погашая яве, преблаженне Александре.

Иже к честней раце твоей притекающе, премудре, от сея почерпаем исцеления сокровище, и чудес пучину, и дар независтный, Александре. Темже, поюще, тя восхваляем.

Душевная чувства от ужаснаго, преподобне отче, просвещ видения, яко чуден разум благих стяжал еси, иночества житие имущим, Александре, неблазненно житие показал еси.

Богородичен: Иже прежде век Рождся от Отца неизреченно, напоследок из утробы Твоя пройде и обожил наше естество, Мати Дево, Иже преподобных лики яве изводиши.

Катавасия: Жезл во образ тайны приемлется, / прозябением бо предразсуждает священника, / неплодящей же прежде Церкви, / ныне процвете древо Креста, / в державу и утверждение.

Седален, глас 8.

Подобен: Премудрости:

От юности вся оставль житейская, / красная же и лепотная, / и в пустыню вселився, / усердно последовал еси Звавшему тебе, преподобне, / в трудех же и постех, отче, / тело твое изнурил еси. / Отонудуже ты пастыря своим овцам добре устраивает всебогатый Господь, / Александре блаженне. / Моли Христа Бога / прегрешений оставление даровати чтущим любовию / святую память твою.

Слава, и ныне, Богородичен:

Яко Деву и едину в женах, / Тя, без семени рождшую Бога плотию, / вси ублажаем, роди человечества: / огонь бо вселися в Тя Божества, / и яко Младенца млеко питаеши Живдителя и Господа. / Тем, ангельский и человеческий род, / достойно славим Пресвятое Рождество Твое / и согласно вопием Ти: / моли Христа Бога согрешений оставление / даровати поклоняющимся верою Пресвятому Рождеству Твоему.

Песнь 4

Ирмос: Вознесена Тя видевши Церковь на Кресте, / Солнце Праведное, / ста в чине своем, / достойно взывающи: / слава силе Твоей, Господи.

Ветрилом, отче, Креста, душевный твой корабль окормив, благоутишно же и легко житейского лютаго потопления избегл еси и к тишине Божественных извлекл еси пристнищ, радуяся.

Обретая, отче, сам себе, всеблаженне, всю ночь стоял еси, яко безплотен, недреманно око имел еси и чисто, якоже зеркало, духовною зарею и Божественная явления чистым помыслом приемля.

Яко Божественный зрится рай, премудре, храм, имея в себе твоих мощей раку, цветы принося чудесныя, имиже сердца наслаждаются верою, Александре, присно хвалящих тя.

Богородичен: Святая Богородице, освяти нас, Яже Пресвятаго Бога рождши плотию, уподобитися восхотевша человеком, и Небеснаго жития вся покажи, Пречистая, причастники молитвами Твоими.

Ин

Ирмос: Пришел еси от Девы не ходатай, / ни Ангел, / но Сам, Господи, воплощся, / и спасл еси всего мя, человека. / Тем зову Ти: / слава силе Твоей, Господи.

Житие твое, Богоносе преблаженне Александре, правило известно монашествующих бысть, емуже ныне ревнующе, спасаемся, иже твоим последующе, отче, Божественным учением.

Духа Святаго зарю прием, звезда пресветлая, отче Александре, сияя благодатию, был еси всем, ихже наставил еси к спасения пристанищу твоими учении.

Пребыти внутрь никакоже міра восхотел еси, премудре отче Александре, имея наставляющаго тя Божия Духа силу, в непроходимых пустынях живой и со зверьми ходя без боязни, юноша сый, и болезнями питался еси телесными.

Богородичен: Плещьми херувимски страшными носим, Владыко, яко на престоле огненне, в Твою, Чистая, вселися утробу и плоти приятием человеческое обожи существо, яко учит изрядный в преподобных Александр, едина Всепетая.

Катавасия: Услышах Господи, / смотрения Твоего таинство, / разумех дела Твоя, / и прославих Твое Божество.

Песнь 5

Ирмос: Ты, Господи, мой Свет, в мир пришел еси, / Свет Святой, / обращаешь из мрачна неведения / верою воспевающийя Тя.

Просвещаемь зарею, отче, невечернею и Божественным облистанием, бесовский мрак и страстную мглу отгнал еси, и явился еси столп светозарен, лествица воистинну, к Богу верныя возводящи.

Бодр ум всегда имея, отче Богомудре Александре, страсти успил еси душетленные, к Божественному светозарению хотя достигнути, к незаходимаго Света светлости, идеже есть веселящихся жилище.

Яко очистившу помышления, преподобне, благодать тебе дадеся, яко пророку: яко настоящая, глаголеши будущая, зриши же дальняя, яко ближняя, Александре, Божие обителище.

Богородичен: Рождши, Пренепорочная, Бога Еммануила, и Человека яве за милосердие бывша, Егоже моли, яко Человеколюбца, Чистая, ущедрити люди согрешшия.

Ин

Ирмос: Ходатай Богу и человеком был еси, Христе Боже: / Тобою бо, Владыко, / к Светоначалинику, / Отцу Твоему, / от ночи неведения приведение имама.

Возжелев ум твой хранить соблюденными заповедей, Александре, и плотское възыграние твоим воздержанием увядил еси, и пастырь показался еси боголюбезному твоему совокуплению.

Законом Божественным последуя, премудре Александре, и повелением повинуюся Сотворшаго, законоположник явился еси монахов и правило известнейшее, наказатель безумных, и наставник заблудших, и светильник во тьме неведения, преславне.

Огнь искушений и страстей печь слезами твоих, отче, течений и духовною росою богато угасил еси, соблюдеся неопалим: опаляемь бо любовию всех Царя, вещная увядил еси желания.

Богородичен: Житейская не могут уста по достоянию Тя пети, Всепетая, вышшу сущу Херувим и всякия твари. Темже с Божественным Александром Владыку о всех нас умоли.

Катавасия: О Треблаженное древо, / на немже распяся Христос, Царь и Господь. / Имже паде древом прельстивый, / тобою прельстився, / Богу пригвоздившуся плотию, / подающему мир душам нашим.

Песнь 6

Ирмос: Пожру Ти со гласом хваления, Господи, / Церковь вопиет Ти, / от бесовския крове очищися / ради милости от ребр Твоих истекшею Кровию.

Неболезненную жизнь в болезнех восприял еси и болезней лютых уставляеши озлобления верою просящим прияти исцеление, Александре всечестне. Темже разреши болезни наша душевныя и телесныя.

К раце твоей священной приступающе, благоухания Божественнаго разума исполняемся, преблаженне Александре, смрада избавляющесея страстей, любовию тя чтущии, отче преподобне.

Исправляеши, отче, хромых и очи просвещаеши слепых, ходити же твориши расслабленных о Христе и отгониши духи лукавыя, Александре преподобне.

Богородичен: На Тя, яко дождь на руно, сшед, Богородице, Спас изсуши яве потоки безбожия, души же наша напаяя всегда, присно чтущия Тя.

Ин

Ирмос: В бездне греховней валяся, / неизследную милосердия Твоего призываю бездну: / от тли, Боже, мя возведи.

Смысленно ты временная проразсудив, Александре блаженне, вечнующая болезнями воздержания достигл еси, отче, душам строитель быв, преподобне.

Яко терпящу ти вельми поты трудов твоих, преподобне Александре, удобь воздержанием, чудный отче, явлься, Владыка тебе Христос вручает силу Божественну и сим ти недуги повелевает целити.

Монашествующих наставник быв, премудре Александре, сущих ти единообразных лавры, и образ и начертание добродетельных деяний сый, украсил еси вся, яже во обители супружных пребывания.

Богородичен: Нов, якоже Моисей, явлься, устроил еси, яко скинию, ограду, всечестне, юже и превозрастил еси болезнями и поты твоими, весь возложився Пречистой Матери Божии.

Катавасия: Воднаго зверя во утробе, / длани Иона крестовидно распростер, спасительную страсть проображаше яве. / Тем тридневен изшед, премірное воскресение прописаше, / плотию пригвожденнаго Христа Бога, / и тридневным воскресением мїр просвещшаго.

Кондак, глас 8:

Яко многосветлая звезда, днесь в странах Российских / возсиял еси, отче, вселився в пустыню, / Христовым стопам последовати усердно возжелел еси / и, Того святое иго на рамо твое взем, Честный Крест, / умертвил еси труды подвиг твоих телесная възгырания. / Темже вопием ти: спаси стадо твое, еже собрал еси, мудре, да зовем ти: / радуйся, преподобне Александре, отче наш.

Икос: Како восхваляю твоя подвиги и борения, преподобне Александре? Яко невеществен разум стяжав смирением, житие твое препроводил еси зельным

воздержанием трудов твоих. Аще убо и человек был еси естеством, но Вышняго Иерусалима явился еси гражданин: с плотию бо на земли пожил еси, но ангельское пребывание прошед и был еси столп, страстьми непотрясом. Тем вся Российская земля, тобою обогощашия, хвалит тя и верою величает, взываючи тебе таковая: радуйся, отечеству твоему похвала, Великому же Новуграду и всей стране Российстей пресветлый светильниче. Радуйся, иже благочестива отца преславная отрасль и благоговейны матери ветвь многоплодна. Радуйся, целомудрия непреклонный столпе и монахов пресветлая слава. Радуйся, пастырю Христовы ограды словесных овец, ихже к Божию приводя разуму. Радуйся, ты бо многочадну пустыню возделал еси высотой смирения твоего. Радуйся, монашествующих всех образ добродетели и единообразных лавры спасение. Радуйся, красное добродетелей хранилище и всем, в печали унывающим, утешение. Радуйся, яко, вся мiра сего мудрования презрев, страсти плотския умертвил еси. Радуйся, яко Ангелом собеседник быти сподобился еси и вся бесовския полки посрамил еси. Радуйся, ты бо во всех странах прославлен был еси, о Христе бо многа чудеса сотворил еси. Радуйся, яко воистинну обрел еси Божию благодать и со Ангелы присно зрети сподобился еси лицом к лицу Святую Троицу. Радуйся, яко второе солнце, сияя чудесы, всем даруеши благодать исцелений. Радуйся, преподобне Александре, отче наш.

Песнь 7

Ирмос: В пещи авраамстии отроцы персидстей, / любовьи благочестия паче, / нежели пламенем, опаляеми, взываху: / благословен еси в храме славы Твоя, Господи.

Освящяся от младенства доброгласною трубою молитвы твоя, и неплодныя утробы многоплодны сотворил еси, слепым подаеши прозрение и хромым благотечение, Александре преблаженне.

Слезными излиянии погасил еси страстей разжжения, Александре блаженне, чудес источил еси струи присноживотны, имиже омываются душ же и телес недужи, преславне.

Терпение стяжав многое, премудре, воздержание, веру и любовь истинну, явился еси отец сирым, вдовицам заступник милостив и смирен, Александре, монахом слава и похвала.

Богородичен: Како доиши млекоу Сына, Чистая, без отца, Питающаго всякое дыхание, Мати Пречистая? Како на руку носиши вся Содержащаго? Паче ума чудо Твое. Тем поем величия Твоя.

Ин

Ирмос: Богопротивное веление беззаконнующаго мучителя / высок пламень вознесло есть. / Христос же простре богочестивым / отроком росу духовную, / Сый благословен и препрославлен.

Крепостию одеаяся, Александре, Владычнюю и, яко прах, сладострастие жития попрали еси, любовь побуждаемъ нетленной жизни, ейже ныне и причастился еси, с лики Ангел, отче, сочетався.

Крестообразно простирая длани твоя, Александре премудре, и молитвы твоя възсылая Вышнему, яко Христа, Царя славы, со Ангелы, очима явленно, Богоносе, узрел еси, и, в пустынях непроходных водворяясь, ищай Господа, Божественною твю благодатию соблюдающа.

Яко звезду твю, Александре, всемирну, монахов светило незаходимое, помощника в бедах и грешником великое прибежище введый, ходатая и молитвенника твю предлагаю Владыце Христу, всечестне.

Богородичен: Видети желая Твой угодник Твоего Сына и Бога неизреченную славу, Богородительнице, Сего Честный Крест на рамо взем, последова живоносным Его стопам.

Катавасия: Безумное веление мучителя / злочестиваго люди поколеба, / дышущее презрение и злохуление богомерзкое: / обаче три отроки не устраши ярость зверская, / ни огонь снедаяй, но противодышущу росоносному Духу, / со огнем суще пояху: / препетыи отцев и нас Боже, благословен еси.

Песнь 8

Ирмос: Руце распростер, Даниил / львов зияния в рове затче, / огненную же силу угасиша, / добродетелию препоясавшися, / благочестия рачители, отроцы, взывающе: / благословите, вся дела Господня, Господа.

Умом безстрастия очищен, беседовал еси Господеви Вседержителю, от Негоже неизглаголанно, преподобне, научаемъ, пророчески предглаголали еси, просвещая души, яко велик, всеблаженне, пророк. Тем твю согласно, Александре премудре, вернии, похваляем, поюще: благословите, вся дела Господня, Господа.

Подавая тебе, яже противу любви, Зиждатель и от юности соблюдая твю десницею, малым бытием, самовозрастшим от земли, питает твю боголепно, яко от младенства всяко похотение поправша и поюща: благословите, вся дела Господня, Господа.

Яко струя Божественна исцелений, происходящи от раки твоя, вся исцеляет, и омывает скверны страстей, и гноение лютых очищает, и верных напаяет всех сердца, Александре премудре, любовь поющих: благословите, вся дела Господня, Господа.

Богородичен: Воплощся Безплотный из Тебе боголепно, Егоже моли, Пречистая, страсти плоти моя умертвити и оживити мою умерщвленную душу грехми.

Ин

Ирмос: Пещь иногда огненная в Вавилоне действия разделяше, / Божиим велением халдеи опаляющая, / верныя же орошающая, поющая: / благословите, вся дела Господня, / Господа.

Якоже молния великими блистании, житие сияющее всем возсия воздержания твоего, Александре премудре, благочестно Зиждителю зовущим: благословите, вся дела Господня, Господа.

На земли яко человек ходя, отче Александре, житие себе на Небесех яко воистинну стяжал еси, Ангелом собеседник явлься, житие же и жизнь совершая оных. С нимиже воспеваеши ныне: благословите, вся дела Господня, Господа.

Тя, паче ума из Нерожденна Отца, прежде век Рожденна Сына, славный проповеда Александр, и Духа Пресвятаго, Едину Троицу естеством ведый Божества.

Богородичен: Якоже Илия первее в Кармиле вселися, тако и ты, в пустынях непроходных упражняся, возжелал еси особь с Богом жити и, богоначальными озарився видении, угодник явился еси Богородице, вопия Ей: радуйся, Обрадованная.

Катавасия: Благословите отроцы, / Троицы равночисленнии, / Содетеля Отца Бога, пойте снизшедшее Слово, / и огонь в росу претворшее, / и превозносите всем жизнь Подавающаго, / Духа Всесвятаго, во веки.

Песнь 9

Ирмос: Камень нерукосечный / от несекомыя горы, Тебе, Дево, / краеугольный отсечеса, / Христос, Совокупивый разстоящаяся естества. / Тем, веселящся, Тя, Богородице, / величаем.

Твоя священная и святая мощи, во гробе лежаща, многообразныя недуги исцеляют и попаляют полки бесовския всегда, мудре Александре: Божию бо благодатию точиши всем исцеления, верно тя присно блажащим.

Струи нам исцелений всегда честная твоя рака явися, отче, страстей изливание всяческих изсушающи и вся напояющи души ко благоплодию Божественному, премудре Александре, Христов угодниче.

Память твоя днесь, яко солнце, возсия, Александре преблаженне, благочестивых сердца озаряющи болезней твоих и чудес сиянием, яко воистинну просвещающи, отче, в нюже вся ны помяни, верно чтущия тя.

Богородичен: Глас приносим Ти Гавриилов, радующся: радуйся, глаголюще, место священния, радуйся, преподобных славо и всех верных спасение, еяже ради обожихомся, Богородице Приснодево.

Ин

Ирмос: Безначальна Родителя Сын, Бог и Господь, / воплощяся от Девы, нам явися, / омраченная просветити, / собрати расточенная. / Тем Всепетую Богородицу величаем.

Стопам последуя, преподобне и Богоносе, Владыки Христа, благочестно пожив на земли, кроток, незлобив явился еси, милостив и смирен, Александре, и любви исполнен Божественныя, сего ради тя верно восхваляем.

Исплетеса тебе венец, яко победителю, Александре, живоносную и вседержительную десницею, отче, и ныне поющая память твою сподоби, блаженне, улучшить оставление согрешений, преславне.

Совокупился еси со Безплотными воинствы, и преподобным ликом сочтался еси, и со избранными всеми ликуещи, претворяся истинным обожением и безсмерною, отче, жизнью, с нимиже непрестанно о нас твоего Владыку умоли.

Богородичен: Храме освященный, вмещен Единому от Троицы сый, храм Твой, Владычице, угодник Твой Александр честен воздвиже в славу Твою и честь, в немже не престай моляся, датися нам помощи молитвами Твоими.

Катавасия: Таин еси, Богородице, рай, / невозделанно возрастивший Христа, / имже Крестное живоносное на земли насадися древо. / Тем ныне возносиму, покланяющеса ему, / Тя величаем.

Светилен.

Подобен: Духом во святыни:

Благодать преизбысть Божия в души твоей, премудре Александре, и, яко безплотен, на земли пожил еси. Тем почитающих тя страстей избави темных облак, к тихому пристанищу приводя и отгоняя ополчения бесовская Божественною силою.

Слава, и ныне, Богородичен:

Сотвори воистинну с Тобою величия Сын Превечный Отчим советом: Жизнь бо нетленную без страсти родила еси и пребыла еси, якоже прежде Рождества, Дева, матерских избегши болезней и по Рождестве Девою пребывши.

На хвалитех стихиры на 4, глас 4,

Подобен: Дал еси знамение:

Преподобне и Богоносе, / житие твое прошед нескверно, / терпение же, и кротость, / и любовь нелицемерну, / воздержание безмерно, всенощное стояние, / умиление божественно, / веру и надежду истинну / с милованием, отче, стяжав, / яко Ангел, пожил еси на земли с телом, / Александре блаженне, / молитвенниче о душах наших.

Яко земный Ангел и Небесный человек, / был еси, премудре, / источник умиления / и щедрот струя независтна явился еси, / пучина чудес, грешником испоручник, / маслина воистинну Божия плодовита, / маслом трудов твоих, Александре чудне, / умащая сердца верно восхваляющих тя.

Преподобне и Богоблаженне, / умертвил еси плоти мудрование / Божественными разумении, / телесных превыше страстей был еси, / и смешен дольными нося начертание, / изображая в себе Божественную доброту, / и показался еси весь световиден действием Святаго Духа, / Александре, отче наш, / инокующим украшение.

Источник чудес показа / и реку дарований раку мощей твоих человеком Господь, / Александре премудре: / слепым еже видети сия даровася, / прокаженным очищение, / одержимыя нечистыми духи / от тех власти избавляеши / и целомудрие тем твориши, исцеление неоскудно.

Слава, глас 6:

Радуйся, постником светило многосветлое, / иноком звезда незаходимая, / пастырем похвала, / отче Александре, / преподобным совсельниче. / Радуйся, Троицы пресветлое жилище. / Радуйся, любве и милования источниче. / Радуйся, пресветлый светильниче разсуждения. / Радуйся, правило добродетелей истинное. / Радуйся, столпе одушевленный. / Радуйся, Великому Новуграду / похвала и утверждение.

И ныне, Богородичен:

Богородице, Ты еси лоза истинная, / возрадившая нам Плод живота, / Тебе молимся, молися, Владычице, / со святыми апостолы помиловати души наша.

Славословие великое. И отпуст.

На Литургии

Блаженны от канона, песни 3-я и 6-я.

- 1) Жезлом воздержания страстное море, отче, разделив, прешел еси неистоплен, и предел достигл еси истиннаго безстрастия, и, Богу предстоя, беседовал еси ума чистотою.
- 2) Кто твоя подвиги, Александре, по достоянию изрещи возможет? Ты бо, пути жестокия в пустыни шествуя, сурово былие ял еси, вкушение же отлагал еси пищи болезнями воздержания.
- 3) Яко маслина плодovита в дому Господни, прозябл еси, маслом трудов твоих, Александре, умащая наша лица; поющия тя, преподобне и Богоблаженне, вся ны посети, моляся Человеколюбцу.
- 4) Из Тебе, Чистая, Цвет неувядаемый, благоухая все человечество Божественным муром естества Своего, Иже Отцу Собезначальный, из Тебе быв под летом, Дево Всенепорочная.
- 5) Неболезненную жизнь в болезнех восприял еси и болезней лютых уставляеши озлобления верою просящим прияти исцеление, Александре всечестне. Темже разреши болезни наша душевныя и телесныя.
- 6) К раце твоей священной приступающе, благоухания Божественнаго разума исполняем, преблаженне Александре, смрада избавляющесея страстей, любовьию ты чтущии, отче преподобне.
- 7) Исправляеши, отче, хромых и очи просвещаеши слепых, ходити же твориши разслабленных о Христе и отгониши духи лукавыя, Александре преподобне.
- 8) На Тя, яко дождь на руно, сшед, Богородице, Спас изсуши яве потоки безбожия, души же наша напаяя всегда, присно чтущия Тя.

Тропарь, глас 4:

От юности, Богомудре, / желанием духовным в пустыню вселився, / единого Христа возжелал еси усердно / стопам в след ходити. / Темже и ангельстии чини, зряще тя, удивишася: / како, с плотию к невидимым кознем подвизався, премудре, / победил еси полки страстей воздержанием / и явился еси равноангелен на земли. / Александре преподобне, / моли Христа Бога, да спасет души наша.

Кондак, глас 8:

Яко многосветлая звезда, днесь в странах Российских / возсиял еси, отче, вселився в пустыню, / Христовым стопам последовати усердно возжелел еси / и, Того святое иго на рамо твое взем, Честный Крест, / умертвил еси труды подвиг твоих телесная взыграния. / Темже вопием ти: спаси стадо твое, еже собрал еси, мудре, да зовем ти: / радуйся, преподобне Александре, отче наш.

Прокимен, глас 7: Честна пред Господем смерть преподобных Его.

Стих: Что воздам Господеви о всех, яже воздаде ми?

Апостол к Галатам, зачало 213.

Аллилуия, глас 6: Блажен муж, бояйся Господа, в заповедех Его восхощет зело.

Стих: Сильно на земли будет семя его.

Евангелие от Луки, зачало 24.

Причастен: В память вечную:

Молитва

О священная главо, Ангеле земный и человеке Небесный, преподобне и Богоносне отче наш Александре, изрядный угодниче Пресвятыя и Единосущныя Троицы, являй многия милости живущим во святей обители твоей и всем с верою и любовью притекающим к тебе! Испроси нам вся благопотребная к житию сему временному и нужная к вечному спасению нашему. Пособствуй и предстательством твоим, угодниче Божий, на враги видимыя и невидимыя, да в мире глубоце пребудет Святая Православная Церковь Христова и благостроении зиждется, во всяком благочестии нерушимо. Буди всем нам, чудотворче святыи, помощник скорый во всякой скорби и обстоянии. Наипаче же в час кончины наша явися нам заступник благосердый, да не предани будем на мытарствех воздушных власти злобнаго миродержца, но да сподобимся непреткновеннаго восхода в Царствие Небесное. Ей, отче, молитвенниче наш присный! Не посрами упования нашего, не презри смиреннаго моления наша и предстательствуй за нас пред Престолом Живоначальныя Троицы, да сподобимся вкупе с тобою и со всеми святыми мы, недостойнии, в селениих райских славити величие, благодать и милость Единого в Троице Бога, Отца, и Сына, и Святаго Духа, во веки веков. **Аминь.**

Молитва преподобнаго Александра Свирскаго Господу Богу и Пресвятей Богородице

Боже, очисти мя, грешнаго, и помилуй мя, и прости ми, Господи Боже, Спасе Милостивый! Дажь ми, Господи, христианский конец с Пречистым Телом и с Честною Кровию, со слезами и покаянием. Избави, Господи, муки вечныя, огня негасимаго, и червья неусыпающаго, и смолы кипящая. Господи, Ты создал мя еси, Господи, Ты помилуй. Господи, Твое есмь создание.

Пречистая Госпоже Милостивая, Царице Небесная, помолися Господу Богу и Спасу нашему Иисусу Христу, Сыну Твоему, за мене, грешнаго раба Твоего (**имя рек**). Дажь ми, Госпоже, христианский конец с Пречистым Телом и с Честною Кровию и со слезами и покаянием. Избави, Госпоже, муки вечныя, огня неугасимаго, и червья неусыпающаго, и смолы кипящая. Пречистая Госпоже, Милостивая Царице Небесная, Ты еси Молебница ко Господу Богу и Спасу нашему Иисусу Христу за мене, грешнаго и окаяннаго раба Твоего (**имя рек**), Ты еси Помощница, Ты Заступница от всякаго зла и сопостата, не забуди, Пречистая Госпоже, нищаго Твоего до конца.

Посем: Заступнице Усердная, Благоутробная Господа Мати, к Тебе прибегаю аз, окаянный и паче всех человек грешнейший. Вонми гласу моления моего и вопль мой и стенание услыши. Яко беззакония моя превзыдоша главу мою и аз, якоже корабль в пучине, погружаюся в море грехов моих. Но Ты, Всеблагая и Милосердная Владычице, не презри мене, отчаяннаго и во гресех погибающаго. Помилуй мя, кающагося в злых делех моих, и обрати на путь правый заблудшую окаянную душу мою. На Тебе, Владычице моя Богородице, возлагаю все упование мое. Ты, Мати Божия, сохрани и соблюди мя под кровом Твоим ныне, и присно, и во веки веков. **Аминь.**

Таже молитва по вся дни:

Душе, душе моя, почто жалуешься на Господа? Яко леность твоя вечней муце ходатай есть. Аще бы ведала дар Божий, плакала бы ся горящими слезами, стенаючи со воздыханием, скорбящи о всяком гресе, о малем и о велицем. Возопий ко Своему Владыце, да не предварит тебе ярость одержащаго всеильною рукою праведною. Аз же, грешный и ленивый и льстивый язык имеяй, како помолюся Владыце моему, да избавит мя Господь от Страшнаго Суда? Всегда бо трепещу помыслом в сердцы моем о Страшнем Суде, да избавит мя от муки вечныя, и червия неусыпающаго, и тьмы кромешныя, и от грозы несогреемяя. Помилуй мя, грешнаго раба Твоего (**имя рек**), яко Павла апостола, егоже любяше паче всех, и от нас, убогих, не отврати лица Твоего во он День Страшный, егоже трепещет душа моя и составы тела моего ужасаются. Господи, избави мя страшнаго часа, да не отпаду от милости Твоея. Но молю святыя Ангелы и Архангелы, и пророки, и мученики, и вся святыя, да молят Бога за мою душу. Вашего ради моления да возвратит Владыка требы Своя от мене, грешнаго. И ты, Пречистая Госпоже Дево, имущи дерзновение к Сыну о рабех Твоих, не забуди трудов раба Твоего (**имя рек**). Владыко Спасе, от убогия души Тебе молюся, избави мя от печали грехов моих и введи в радость безконечнаго жития, идеже прославляется всесвятое Имя Твое, Отца и Сына и Святаго Духа, всегда, ныне, и присно, и во веки веков. **Аминь.**